

গণপ্রজাতন্ত্রী বাংলাদেশ সরকার  
তথ্য অধিদফতর  
বাংলাদেশ সচিবালয়  
ঢাকা

সংবাদ গতিধারা

জাতীয় দৈনিকসমূহে প্রকাশিত সম্পাদকীয়'র সারসংক্ষেপ, গুরুত্বপূর্ণ নিবন্ধ ও ফিচারের সংক্ষিপ্তসার

সংখ্যা : ৯৫/২০১৭

ঢাকা, সোমবার ১৫ মে ২০১৭, ১ জ্যৈষ্ঠ ১৪২৪

আজকের দৈনিক পত্রিকাগুলো নিম্নলিখিত বিষয়গুলোকে প্রাধান্য দিয়ে খবর ছেপেছে :

- ১। চলতি অর্থবছরের জিডিপি প্রবৃদ্ধি লক্ষ্য ছাড়িয়েছে
- ২। আগামী অর্থবছরের জন্য এক লাখ ৬৪ হাজার ৮৪ কোটি টাকার এডিপি অনুমোদন
- ৩। সরকারি ক্রয় কমিটিতে ৬ প্রস্তাব অনুমোদন
- ৪। সন্ত্রাস-জঙ্গিবাদ নিয়ন্ত্রণে সক্ষম হয়েছে বর্তমান সরকার : স্বরাষ্ট্রমন্ত্রী
- ৫। নিরাপদ মাতৃত্বের জন্য মিডওয়াইফারি সেবা অপরিহার্য : স্বাস্থ্যমন্ত্রী
- ৬। বাজেট অধিবেশ আগামী ৩০ মে শুরু
- ৭। পণ্যে পাটের মোড়ক ব্যবহার নিশ্চিত আজ থেকে অভিযান
- ৮। ভ্রাম্যমাণ আদালত নিয়ে হাইকোর্টের রায় স্থগিত
- ৯। ৩৫তম বিসিএস থেকে প্রথম শ্রেণি নন ক্যাডার পদে আরো ১৬০ জনকে নিয়োগের সুপারিশ
- ১০। ১২ হাজার কোটি ডলার বিনিয়োগ করবে চীন  
: ওয়ান বেল্ট ওয়ান রোড শীর্ষ সম্মেলনে অঙ্গীকার

১। চলতি অর্থবছরের জিডিপি প্রবৃদ্ধি লক্ষ্য ছাড়িয়েছে

চলতি অর্থবছরের (২০১৬-১৭) প্রাথমিক হিসাবে মোট দেশজ উৎপাদনের (জিডিপি) প্রবৃদ্ধি হয়েছে ৭ দশমিক ২৪ শতাংশ, যা দেশের ইতিহাসে সর্বোচ্চ। বাজেটে এবার প্রবৃদ্ধির লক্ষ্য ঠিক করা হয়েছিল ৭ দশমিক ২ শতাংশ। এ হিসাবে বাজেটের প্রত্যাশাকেও ছাড়িয়ে গেছে দেশের সামষ্টিক অর্থনীতি। উল্লেখ্য, গত ২০১৫-১৬ অর্থবছরের প্রবৃদ্ধি ৭ শতাংশের ঘর (৭ দশমিক ১১) অতিক্রম করে। অন্যদিকে চলতি অর্থবছর শেষে বাংলাদেশের মানুষের মাথাপিছু আয় বেড়ে ১ হাজার ৬০২ ডলার হবে। গত অর্থবছর চূড়ান্ত হিসাবে মাথাপিছু আয় ছিল ১ হাজার ৪৬৫ ডলার। এ হিসাবে এক বছরে মাথাপিছু আয় বাড়ছে ১৩৭ ডলার। চলতি অর্থবছরের প্রথম দশ মাসের (জুলাই-এপ্রিল) তথ্য বিশ্লেষণ করে বাংলাদেশ পরিসংখ্যান ব্যুরো প্রবৃদ্ধি ও মাথাপিছু আয়ের এই হিসাব করেছে। প্রবৃদ্ধি এবং সার্বিকভাবে মাথাপিছু আয় বাড়ায় দেশের মানুষকে অভিনন্দন জানিয়েছেন প্রধানমন্ত্রী শেখ হাসিনা। গতকাল ১৪ মে রোববার জাতীয় অর্থনৈতিক পরিষদের (এনইসি) সভায় প্রধানমন্ত্রী বলেন, এটা সম্মিলিত প্রচেষ্টার ফল। এটি অর্জন সম্ভব হয়েছে সরকারের ধারাবাহিকতা এবং দেশের সকল শ্রেণী ও পেশার মানুষের যার যার অবস্থান থেকে অবদান রাখার কারণে। তাই সকলে মিলে কাজ করে গেলে আমরা কাজক্ষিত লক্ষ্যে পৌঁছাতে পারব। সূত্র-জনকণ্ঠ (পৃ.১,ক.১), ইন্ডিপেনডেন্ট (পৃ.১,ক.৭), নিউজ টুডে (পৃ.১,ক.৭)। জনকণ্ঠ, ডেইলি স্টার, ডেইলি সান, ফিনানশিয়াল এক্সপ্রেস এ বিষয়ে লিড নিউজ ছেপেছে।

২। আগামী অর্থবছরের জন্য এক লাখ ৬৪ হাজার ৮৪ কোটি টাকার এডিপি অনুমোদন

আগামী ২০১৭-১৮ অর্থবছরের জন্য মোট ১ লাখ ৬৪ হাজার ৮৪ কোটি টাকার বার্ষিক উন্নয়ন কর্মসূচি (এডিপি) অনুমোদন দিয়েছে সরকার। এর মধ্যে স্বায়ত্তশাসিত সংস্থার নিজস্ব অর্থায়নে বাস্তবায়নীয় প্রকল্পের জন্য বরাদ্দ রাখা ১০ হাজার ৭৫৩ কোটি টাকা বাদে মূল এডিপির আকার দাঁড়ায় এক লাখ ৫৩ হাজার ৩১১ কোটি টাকা। এতে সবচেয়ে বেশি বরাদ্দ পেয়েছে স্থানীয় সরকার ও বিদ্যুৎ খাত। ২০১৭-১৮ অর্থবছরে উন্নয়ন কর্মসূচির জন্য যে বরাদ্দ রাখা হয়েছে, তার মধ্যে ৯৬ হাজার ৩৩১ কোটি টাকার জোগান আসবে সরকারের নিজস্ব তহবিল বা দেশীয় উৎস থেকে, যা মোট বরাদ্দের প্রায় ৬৩ শতাংশ। আর প্রকল্প সাহায্য হিসেবে বৈদেশিক মুদ্রায় পাওয়া যাবে ৫৭ হাজার কোটি টাকা, যা মোট বরাদ্দের ৩৭ শতাংশ। এই এডিপি চলতি অর্থবছরের বরাদ্দের চেয়ে ৪২ হাজার ৬৩১ কোটি টাকা, বা ৩৯ শতাংশ বেশি। গতকাল ১৪ মে রোববার শেরেবাংলা নগরে প্রধানমন্ত্রী শেখ হাসিনার সভাপতিত্বে জাতীয় অর্থনৈতিক পরিষদের (এনইসি) সভায় নতুন অর্থবছরের এডিপি অনুমোদন দেওয়া হয়েছে। সূত্র-সংবাদ (শেষ.পৃ.ক.৩), জনকণ্ঠ (পৃ.১,ক.১), নিউজ টুডে (পৃ.১,ক.২), অবজারভার (পৃ.১,ক.১)।

৩। সরকারি ক্রয় কমিটিতে ৬ প্রস্তাব অনুমোদন

হযরত শাহজালাল আন্তর্জাতিক বিমানবন্দর সম্প্রসারণে পরামর্শক প্রতিষ্ঠান নিয়োগসহ ছয়টি প্রস্তাব অনুমোদন দিয়েছে সরকারি ক্রয় সংক্রান্ত মন্ত্রিসভা কমিটি। প্রকল্পগুলো বাস্তবায়নে প্রায় ২ হাজার ১৪৮ কোটি টাকা ব্যয় হবে। গতকাল ১৪ মে রোববার সচিবালয়ে মন্ত্রিপরিষদ বিভাগের সম্মেলন কক্ষে অর্থমন্ত্রী আবুল মাল আবদুল মুহিতের সভাপতিত্বে অনুষ্ঠিত সরকারি ক্রয় কমিটির বৈঠকে এসব ক্রয় প্রস্তাব অনুমোদন দেওয়া হয়। সূত্র-সংবাদ (শেষ.পৃ.ক.১), ফিনানশিয়াল এক্সপ্রেস (শেষ পৃ.ক.৩)

৪। স্বরাষ্ট্র-জঙ্গিবাদ নিয়ন্ত্রণে সক্ষম হয়েছে বর্তমান সরকার : স্বরাষ্ট্রমন্ত্রী

স্বরাষ্ট্রমন্ত্রী আসাদুজ্জমান খাঁন কামাল বলেছেন, একটি অপার সম্ভাবনাময় দেশ হওয়ায় আমাদের প্রিয় মাতৃভূমিকে নিয়ে দেশীয় ও আন্তর্জাতিক ষড়যন্ত্রকারীরা সক্রিয়। এ ষড়যন্ত্র থেকে দেশকে বাঁচাতে সরকারের যুগোপযোগী পদক্ষেপে আলেম-ওলামা, কৃষক-যুবকসহ সব শ্রেণি-পেশার মানুষ আজ সচেতন হয়েছে। যেভাবে মহান স্বাধীনতা যুদ্ধে সবাই অংশগ্রহণ করেছেন সেভাবে আইনশৃঙ্খলা ও নিরাপত্তা বাহিনীসহ সবার সহযোগিতায় সরকার জঙ্গিবাদ নিয়ন্ত্রণ করতে সক্ষম হয়েছে। গতকাল ১৪ মে রোববার ফেনীর পৌর চত্বরে জেলা কৃষক লীগের ত্রিবার্ষিক সম্মেলনে প্রধান অতিথির বক্তব্যে তিনি এসব কথা বলেন। সূত্র-ভোরের কাগজ (শেষ পৃ.ক.৬), জনকণ্ঠ (পৃ.২,ক.১)।

৫। নিরাপদ মাতৃত্বের জন্য মিডওয়াইফারি সেবা অপরিহার্য : স্বাস্থ্যমন্ত্রী

স্বাস্থ্য ও পরিবারকল্যাণমন্ত্রী মোহাম্মদ নাসিম বলেন, নিরাপদ মাতৃত্বের জন্য মিডওয়াইফারি সেবা অপরিহার্য। মাতৃমৃত্যু কমাতে এই সেবার বিশেষ ভূমিকা আছে। দেশে মিডওয়াইফারি সেবার প্রসার ও এই সেবার ব্যাপ্তির ব্যাপারে রাষ্ট্রের সর্বোচ্চ পর্যায়ের প্রতিশ্রুতি আছে। স্বাস্থ্যমন্ত্রী বলেন, প্রত্যন্ত এলাকায় অনেকে মিডওয়াইফারি সেবা দিচ্ছেন। এদের ব্যাপারে গণমাধ্যমে ইতিবাচক সংবাদ আসা দরকার। এর ফলে অনেকে এ পেশায় আসতে উদ্বুদ্ধ হবেন, পাশাপাশি যাঁরা পেশায় আছেন তাঁরাও উৎসাহিত হবেন। মিডওয়াইফারি সেবা বাড়লে সন্তান প্রসবে অপ্রয়োজনীয় অস্ত্রোপচার কমবে। মিডওয়াইফারি শিক্ষা, প্রশিক্ষণে আর্থিক ও কারিগরি সহায়তা দেওয়ার জন্য তিনি ইউএনএফপিএকে ধন্যবাদ জানান। গতকাল ১৪ মে রোববার প্রথম আলো কার্যালয়ে অনুষ্ঠিত ‘মিডওয়াইফ, মা ও পরিবার : জীবনের অবিচ্ছেদ্য অংশ’ শীর্ষক গোলটেবিল বৈঠকে স্বাস্থ্যমন্ত্রী এসব কথা বলেন। জাতিসংঘ জনসংখ্যা তহবিল (ইউএনএফপিএ) ও প্রথম আলো যৌথভাবে এই বৈঠকের আয়োজন করে। সূত্র-প্রথম আলো (শেষ পৃ.,ক.২), নিউজ টুডে (পৃ.৩,ক.৫), নিউ নেশন (পৃ.৩,ক.৫)।

৬। বাজেট অধিবেশন আগামী ৩০ মে শুরু

দশম জাতীয় সংসদের বাজেট অধিবেশন আগামী ৩০ মে মঙ্গলবার সকাল ১১টায় শুরু হচ্ছে। এটি হবে বর্তমান সংসদের ষষ্ঠদশ এবং চলতি বছরের তৃতীয় অধিবেশন। রাষ্ট্রপতি মো. আবদুল হামিদ সংবিধানের ৭২ অনুচ্ছেদের (১) দফায় প্রদত্ত ক্ষমতাবলে এ অধিবেশন আহ্বান করেন। গতকাল ১৪ মে রোববার সংসদ সচিবালয়ের এক সংবাদ বিজ্ঞপ্তিতে এ কথা জানানো হয়। সংসদের এ অধিবেশনে অর্থমন্ত্রী আবুল মাল আবদুল মুহিত ২০১৭-১৮ অর্থবছরের বাজেট পেশ করবেন। সূত্র-সংবাদ (পৃ.১,ক.১), জনকণ্ঠ (পৃ.১,ক.৮), নিউজ টুডে (শেষ পৃ.,ক.১), ফিনানশিয়াল এক্সপ্রেস (পৃ.১,ক.১)।

৭। পণ্যে পাটের মোড়ক ব্যবহার নিশ্চিত আজ থেকে অভিযান

১৭টি পণ্য সংরক্ষণ ও পরিবহনে পাটের মোড়ক (বস্তা বা ব্যাগ) ব্যবহার নিশ্চিত আজ সোমবার থেকে সারাদেশে বিশেষ অভিযান শুরু হবে। সচিবালয়ে গতকাল ১৪ মে রোববার ‘পণ্যে পাটজাত মোড়কের বাধ্যতামূলক ব্যবহার আইন, ২০১০’ বাস্তবায়ন নিয়ে এক সংবাদ সম্মেলনে বস্ত্র ও পাট প্রতিমন্ত্রী মির্জা আজম এ কথা বলেন। সূত্র-জনকণ্ঠ (পৃ.৩,ক.২), প্রথম আলো (পৃ.১২,ক.৩), অবজারভার (শেষ পৃ.,ক.৪)।

৮। ভ্রাম্যমাণ আদালত নিয়ে হাইকোর্টের রায় স্থগিত

নির্বাহী ম্যাজিস্ট্রেট দিয়ে ভ্রাম্যমাণ (মোবাইল কোর্ট) আদালত পরিচালনা অবৈধ ও অসাংবিধানিক ঘোষণা করে হাইকোর্টের দেওয়া রায় ১৮ মে পর্যন্ত স্থগিত করা হয়েছে। গতকাল ১৪ মে রোববার আপিল বিভাগের চেম্বার কোর্ট বিচারপতি হাসান ফয়েজ সিদ্দিকী রাষ্ট্রপক্ষের আবেদনের পরিপ্রেক্ষিতে এ আদেশ দেন। আপিল বিভাগের নিয়মিত বেঞ্চে বিষয়টির ওপর শুনানি হবে বলে জানিয়েছেন ডেপুটি অ্যাটর্নি জেনারেল মোতাহার হোসেন সাজু। সূত্র-সংবাদ (পৃ.১,ক.১), সমকাল (পৃ.১,ক.৮), নিউজ টুডে (শেষ পৃ.,ক.২), ডেইলি সান (পৃ.১,ক.১), ডেইলি স্টার (শেষ পৃ.,ক.৮)।

৯। ৩৫তম বিসিএস থেকে প্রথম শ্রেণি নন ক্যাডার পদে আরো ১৬০ জনকে নিয়োগের সুপারিশ

৩৫তম বিসিএসের চূড়ান্ত পরীক্ষায় উত্তীর্ণদের মধ্যে থেকে দ্বিতীয় দফা আরো ১৬০ জনকে প্রথম শ্রেণির নন ক্যাডার পদে নিয়োগের সুপারিশ করেছে সরকারি কর্ম কমিশন (পিএসসি)। গতকাল ১৪ মে রোববার এ ফলাফল প্রকাশ করা হয়। প্রথম দফায় গত ১৭ এপ্রিল প্রথম শ্রেণির নন ক্যাডার পদে ৩৯৮ জনকে নিয়োগের সুপারিশ করা হয়। সূত্র-ইত্তেফাক (শেষ পৃ.,ক.১), সংবাদ (পৃ.১,ক.৪)।

১০। ১২ হাজার কোটি ডলার বিনিয়োগ করবে চীন : ওয়ান বেল্ট ওয়ান রোড শীর্ষ সম্মেলনে অঙ্গীকার

চীনের মহাউদ্যোগ ওয়ান বেল্ট ওয়ান রোড নেটওয়ার্কের আওতায় বিভিন্ন দেশে নতুন বন্দর, সড়ক নির্মাণ এবং রেলওয়ে অবকাঠামো পুনর্গঠনে ১২ হাজার ৪০০ কোটি ডলার বিনিয়োগের ঘোষণা দিয়েছে দেশটির সরকার। বেইজিংয়ে বেল্ট অ্যান্ড রোড ফোরাম (বিআরএফ) শীর্ষক চলমান দুই দিনের বৈশ্বিক সম্মেলনের উদ্বোধন ভাষণে গতকাল ১৪ মে রোববার এ ঘোষণা দেন চীনা প্রেসিডেন্ট শি জিনপিং। তিনি জানান, বাণিজ্যই অর্থনৈতিক সমৃদ্ধির চালিকাশক্তি। বাংলাদেশ থেকে প্রতিনিধি হিসেবে তিন প্রতিমন্ত্রী এতে যোগ দেন। এরা হলেন, অর্থ প্রতিমন্ত্রী এম এ মান্নান, বিদ্যুৎ, জ্বালানি ও খনিজ সম্পদ প্রতিমন্ত্রী নসরুল হামিদ এবং তথ্য ও যোগাযোগ প্রতিমন্ত্রী জুনায়েদ আহমেদ পলক। সূত্র-ভোরের কাগজ (পৃ.১,ক.১), সমকাল (পৃ.২,ক.৭), ইন্ডিপেনডেন্ট (শেষ পৃ.,ক.৪) নিউজ টুডে (পৃ.১,ক.২)।

সম্পাদকীয়

- ক. সংবাদ : প্রাথমিক শিক্ষাকে অষ্টম শ্রেণিতে উন্নীতকরণের লক্ষ্যে বাজেটে পর্যাপ্ত বরাদ্দ রেখে সমন্বিত পরিকল্পনায় এগুলোর পাশাপাশি স্কুলগুলোতে যোগ্যতাসম্পন্ন শিক্ষক নিয়োগ করার ওপর গুরুত্বারোপ।
- খ. যুগান্তর : নামিদামি ব্র্যান্ডের বিভিন্ন জুতা কোম্পানি চামড়ার মতো দেখতে রেজিন, প্লাস্টিক ও নকল চামড়ার তৈরি নিম্নমানের পাদুকা ক্রেতাদের কাছে উচ্চমূল্যে বিক্রি করার অভিযোগ পাওয়া গেছে উল্লেখ করে এ ব্যাপারে যথাযথ তদন্ত করে এ প্রতারণামূলক কর্মকাণ্ড বন্ধের সুপারিশ।
- গ. সমকাল : স্বরাষ্ট্র মন্ত্রণালয়ের তালিকায় শীর্ষে থাকা জঙ্গি রেজওয়ান ফারুক যুক্তরাজ্য থেকে এসে হযরত শাহজালাল আন্তর্জাতিক বিমানবন্দরে নির্বিঘ্নে ইমিগ্রেশন থেকে বেরিয়ে আসার ঘটনায় উদ্বেগ প্রকাশ করে এ ঘটনার সাথে জড়িতদের খুঁজে বের করে কঠোর শাস্তির দাবি।
- ঘ. প্রথম আলো : পাবলিক পরীক্ষায় প্রশ্নপত্র ফাঁস হওয়া নিয়মিত ঘটনা হয়ে দাঁড়িয়েছে উল্লেখ করে এ অনৈতিক চর্চা রোধে সংশ্লিষ্টদের কার্যকর পদক্ষেপ নেওয়ার সুপারিশ।
- ঙ. জনকণ্ঠ, ইত্তেফাক : পাট থেকে পলিথিনের বিকল্প পলিব্যাগ উদ্ভাবন করেছেন বাংলাদেশের বিজ্ঞানীরা, তাকে স্বাগত জানিয়ে পরিবেশ সুরক্ষায় তা সহায়ক হবে বলে প্রত্যাশা ব্যক্ত।
- চ. ইন্ডিপেনডেন্ট, ডেইলি সান, ভোরের কাগজ, যায়যায়দিন : বিশ্বের শতাধিক দেশে একযোগে বড় ধরনের সাইবার হামলা হওয়ার পরিপ্রেক্ষিতে বাংলাদেশের সাইবার নিরাপত্তার সার্বিক বিষয়টি উপলব্ধি করে নিরাপত্তা জোরদারের তাগিদ।
- ছ. ডেইলি সান : দেশে রেমিটেন্স চার্জ ফ্রি করার সাথে সাথে রেমিটেন্স পাঠানোর পদ্ধতিকে সব ধরনের বামেলানুক্রম করার সুপারিশ।
- জ. ডেইলি স্টার, অবজারভার : সম্ভ্রাস-বিরোধী অভিযানে ব্যক্তিগত ক্ষয়ক্ষতির ঝুঁকি কমাতে আইন-শৃঙ্খলা বাহিনীকে অভিযানের সময় ব্যাপক নিরাপত্তামূলক ব্যবস্থা নেওয়ার আহ্বান।
- ঝ. নিউ নেশন : ঢাকা সিটি করপোরেশন ও ওয়াসাকে তাদের উন্নয়ন কার্যক্রম বাস্তবায়নে জনগণের দুর্ভোগ বিবেচনায় নিয়ে সেভাবে কাজ করার সুপারিশ করে সম্পাদকীয় প্রকাশ করেছে।

উপ-সম্পাদকীয়

জনকণ্ঠ পত্রিকায় প্রকাশিত কলামে চিকিৎসা ব্যয়কে একটি সহনীয় পর্যায়ে রাখার মাধ্যমে দেশের বিশাল প্রান্তিক জনগোষ্ঠীর অনেক বড় ধরনের উপকার করা সম্ভব বলে উল্লেখ করা হয়েছে।

নিবন্ধ ও ফিচার

ইত্তেফাক পত্রিকায় প্রকাশিত 'সুপেয় পনি এবং সমন্বিত পানিসম্পদ ব্যবস্থাপনা' শিরোনামের নিবন্ধে মোহাম্মদ যোবায়ের হাসান গ্রামীণ অর্থনীতিকে চাঙ্গা করতে স্বাস্থ্য ঝুঁকি কমিয়ে সুপেয় পানির প্রাপ্যতা ও গুণাগুণ যেমন বাড়ানো প্রয়োজন তেমনি সমন্বিত পানি সম্পদ ব্যবস্থাপনাকে ফলপ্রসূ করতে টেকসই বিনিয়োগও দরকার বলে অভিমত প্রকাশ করেছেন।

#